



ル 6
437
16

第十六册
卷之三十四
人物
卷之三十五
孝義
卷之三十六
孝義



盛京通志卷之三十四

人物

本朝

漢祖功臣多起豐沛光武佐命半屬南陽我

朝龍興以來股肱心膂大抵皆天潢之彥與遼海之英

但事載

國史未經見聞不敢妄列惟配享

廟廷及

賜謚論祭之可知者存其名出仕各省有廉能政績之昭

顯者紀其實至郡縣人物附載一二所知未詳者闕

呂
437
卷 16

卷之三十四 人物

以俟考

多羅郡王

順治十一年設位配享

武功郡王

崇德元年設位配享

多羅慧哲郡王

順治十一年配享

多羅宣獻郡王

順治十一年配享

費英東即蜚英東

封直義公崇德元年配享

額亦都

封弘毅公崇德元年配享

楊古利即楊古力

封武勳王順治元年配享

圖爾格即兔爾格

封忠義公順治九年配享

圖賴

封昭勳公順治九年配享

圖海

封文襄公雍正二年設位配享

凡配享之人皆有顯德鴻功詳載

國史位次遵照大清會典

舒爾哈齊

封莊親王

薩哈廉

封穎親王諡曰毅

穆爾哈齊

封貝勒諡勇壯

達海

諡文成奉

勅製清字稱巴克式

大爾差

輔國公諡剛毅

宜爾登

二等伯內大臣諡忠直

明安

二等伯諡忠順

宜孫

兵部尚書諡襄壯

盛京通志
卷之二十四
覺羅塞勒

內大臣諡勤慈

涂魯希

噶喇昂邦諡忠宜

博爾津

都統諡忠宜

彭春

一等公封太子太保

巴都魯

都統諡敏壯

安邊我

都統諡敏壯

何和禮

都統諡溫順

何芍圖

都統三等公諡端慈

阿穆爾圖

盛京將軍諡襄壯

鄂莫克圖

副都統諡壯勤

格爾德

一三等精奇尼哈番諡端順

一納爾臣

一 副都統諡端壯

一 霸拜

一 三等精奇尼哈番諡信順

一 阿蘭珠

一 三等阿思哈哈番諡順毅

一 舒賽

一 三等阿思哈哈番諡壯勤

達諸護

一 三等阿思哈哈番諡襄敏

一 沈永忠

一 蓋州人湖南將軍封國公

一 石漢

一 一等伯加拖沙拉哈番

一 杜磊

一 封二等伯

一 西喇把

一 三等阿達哈哈番諡順壯

安達禮

三等阿達哈哈番諡忠介

敦達禮

三等阿達哈哈番諡忠果

衛奇

三等阿達哈哈番諡端勤

以上俱

國初人生長於斯卒葬於斯或以軍功或以政績加封賜諡表著豐碑向載入名墓中今移於此用見我

朝人物之盛至事蹟載入史冊家乘者尙待稽考云

雅希禪

界蕃之役鼓勇當先遂獲全勝征商堅哈達直貫敵陣既入復出又橫擊其大營敗之擊沙嶺兵衝堅透陣敵遂披靡及克遼陽以功進三等阿思哈哈番卒諡敏果

冷格里

初征達代塔遇蒙古兵力戰破之又進擊蒙古軍殺其他布能二人從征朝鮮擊寧遠皆著勲績後攻義州設方畧克之累功至一等精奇尼哈番卒諡武襄魯克述

東戡人豫知天命率兵四百來歸
國初贈光祿大夫三等伯加贈一等公

阿爾沙蘭

蒙古正黃旗人生有勇畧力大無窮人以獅子比之
其名阿爾沙蘭者猶漢云獅子也初阿爾沙蘭

太宗文皇帝以功授阿達哈哈番順治初入關授侍衛久之與
侍衛商熙並乞東歸奉

太宗陵寢蒙

特旨授頭等侍衛世襲阿達哈哈番與八旗章京守護

昭陵後值樹碑衆架千斤不能起阿爾沙蘭曰吾試舉之汝

等當助吾因以背負碑起就跌衆始相與安跌上蓋
賁育之勇不能過云

沈文奎

字清遠本浙江會稽人客遊於遼遂爲遼東人遭逢

太宗文皇帝選士登第一充秘書院纂修官順治元年應從
入關巡撫畿南次年總督漕務擢宏文館學士充已
丑會試總裁再督漕運適有膠州海時行之叛以功
晉兵部尚書文奎兩任總漕賑濟維揚等處全活無
算督理陝西糧儲勦平叛將身先卒伍勞瘁成疾乞
休卒

鄂碩

勇毅有識功成屢戰封三等伯加封侯爵追贈一等公

車克

鑲白旗滿洲人初以白身管牛录事三次圍錦州時明洪軍門三營步兵聲勢頗盛克率本甲喇兵步戰敗之入山海關時流賊馬步二十萬克隨陣力擊大敗之以功授拜他喇布勒哈番任戶部理事官有治績加拖沙喇哈番歷至二等阿達哈哈番晉大學士卒諡文端

努山

長白山東之巴海人孩提時孝友性成稍長勇毅過人精騎射隨征旅順奪城功第一諡藍甲之先登者大帥嘆服奉使黑龍江收高勒里國入版圖後屢次隨征皆有功從下江浙閩廣諸省兼領戶工兩部事凱還

世祖知其清廉

賜以田宅十六年擢

盛京工部侍郎康熙六年致仕十一年

聖駕東巡與宴

盛京通志

卷之三十四

人物

八

大政殿

賜袍帶等物山性嗜學披堅執銳之餘手不釋卷嘗著論
字務本家訓子孫守為成法故多賢俊第五子天保
中壬午副車怙於進取一時儒林尤推重之

劉秉權

字持平遼東人初從入關授兵部主事遷刑部啓心
郎轉僉都御史國史院學士康熙七年巡撫廣東懲
貪墨禁加派革供應風紀肅然時方巡海民界秉權
安插男女十六萬有奇墾田二萬五千餘頃至復竈
丁而盜謀足減屯賦而戍卒安重師儒崇理學而文

風振皆治績之最著者也歲甲寅潮鎮

權帥師斬偽將金統勤謀勦撫以積勞卒於官

金世德

字孟求鐵嶺人淹貫經史兼習國書順治初以蔭補
內翰林院編修凡有大撰著恒午夜馳召之康熙丙
午招撫閩海有功累遷副都御史出撫畿輔境內漳
水滹沱桑乾諸河沒民田計八萬餘畝久苦征輸世
德請豁再三遂蒙捐除甲寅以後兵需浩繁世德單
騎行營中躬給芻糧兵無橫索市肆晏然己未庚申
旱饑請截漕蠲賑四十餘邑賴以全活每見屬官必

令盡所欲言喜讀循吏傳清白自矢人莫敢干以私
卒諡清惠

徐起元

遼東人明萬曆壬子舉人由應山令以功陞鄖陽巡
撫時當闖獻之亂起元以秘計殺賊孤城獨完及
國朝以功加太子太保卒諡僖靖

胡亮

字太乙遼東人榆林衛籍隨父寓居山海材勇過人
為將校累建奇功歷官副總兵明末寇陷都城
舉義兵亮石河之戰出奇制勝

光祿大夫阿思哈尼哈番卒諡忠敏
白色純

字素公遼東人除理事官歷江西巡撫時閩粵煽亂
南贛擾動賊得民率割其辮我軍遇短髮者輒戮之
民陷賊中多不敢自拔色純愀然曰若不禁止民且
胥化為賊拜疏以請得報可民脫身歸者相屬賊勢
遂孤卒致底定

劉武元

字柱國遼東人幼習韜畧挾策歸

太宗於瀋陽遂從入關順治四年巡撫南贛時下贛驍將多

恣橫武元嚴令甲輯部伍殘黎獲安戊子金聲桓叛
圍贛武元與總兵胡有陞堅守數月聲桓撤圍去命
胡有陞出奇兵追擊大蕪港敗之李成棟自廣擁眾
數萬將薄城武元遣將夜出攻其不意成棟眾潰遂
破滅又分兵擊諸郡盜悉平之後以病乞休卒

蔡士英

號魁吾錦州人順治元年從入關以功擢右副都御
史九年撫江右勘實荒田請免逋賦五十八萬餘免
缺丁五十九萬餘又請減瑞袁二州浮糧民甚德之
晉淮安漕運總督與刊除弊遠近悅服晉大司馬卒

諡襄敏所著有撫江集督漕奏議

張鳳儀

錦州人字瑞梧生員順治初守廣信兵燹之後實心
撫循值貝勒開闢假道廣信鳳儀籌畫供應民力不
煩戊子金聲桓叛圍贛鳳儀與虔撫劉武元總鎮胡
有陞竭力守禦數月糧匱有欲盡戮居民誓死固守
者鳳儀作色曰王師攻城猶不可屠敵民况守城而
屠我民乎虔撫是其說未幾援至一郡獲全

李日芄

字培原遼陽人順治三年由生員任永平知府懲投

充革濫派吏不能爲奸尋陞霸州道副使歷操江都御史時江中寇盜充斥曰瓦每五里設一汛撥兵防禦羣盜屏息又清衙蠹定經賦創立書院惠及士民海寇作亂曰瓦控扼京口擒勦有功

佟國器

字滙白瀋陽人順治二年任嘉湖兵備道勦撫餘孽按集哀鴻再任浙江按察使時浙東初定叛逆繁多國器平情詢鞫釋枉矜疑全活無算十二年巡撫南贛平梅窖坑劇賊會拱辰黃鄉賊楊興及大帽山自扇坑諸盜由是江廣閩楚間賊畧盡調浙撫熟悉瀕

海情形招降僞都督廖明旗勦滅海逆阮六等海疆

寧謐

馬祐

字篤周滿洲人順治壬辰登進士第三人歷官江南巡撫江南舊多逋賦有司挪移報完前後相蒙祐分別吏侵民欠疏請銷追又密疏請蠲康熙元年至八年舊賦一百九十餘萬九年淮揚蘇松等六郡水災疏請蠲賑民免流離十五年霪雨淹沒田廬祐積憂成疾自草遺疏極陳水災民因言不及私聞者感泣

佟國器

遼東人順治三年隨大軍入閩遂任巡撫招流亡安反側遠近懷服戊子歲饑土賊圍城國幣伏兵近郊擒斬渠魁王細居王夫人等又令副將王進田勝等勦捕餘寇境內以安時巡撫周世科酷刑每一獄常延蔓數十家國幣濟以寬仁多所全活

張文德

遼東人順治三年知垣曲縣刑清政簡潔已愛民卒於官士民感涕建祠祀之

白秉貞

字懿生錦州杏山人由貢生於順治丁亥年佐黃郡斷事明決御物慈祥一郡質訟之事咸願歸之東山盜起總督羅綉錦委秉貞率民兵攻之秉貞詳請勦撫兼施凡四閱月四十八砦悉平

張杰

字前川遼東人順治三年浙東初定以總兵鎮定海時海寇盤踞舟山與內地山賊相煽杰勦撫並行復會勦舟山克之移鎮黃巖率温州水師出海從寧海大將軍恢復舟山有功調防京口康熙元年爲浙江水師提督加宮保

陳維新

號燦字遼東人順治四年任昌平兵備道時渤海盜起株連州境維新力爲昭雪民賴保全十年歷浙江右藩州民爲立生祠後撫廣西李定國犯桂林驅象衝小西門人維新亟令將士投木石塞門奪其象賊復穴城西地道實硝黃其中欲轟城維新令掘城內深丈餘戒兵士持火箭併囊土伺穿穴將近卽射箭入穴藥發城崩賊多壓死囊土者出土急築須臾成城賊氣沮遁去事平念粵境屢罹兵火請蠲十年及十一年錢糧民甚德之

李中梧

字燦字遼陽人初任玉田令多惠政擢知永平府有以鋤斃人久未成獄中梧令焚穀草炙血跡宛然讞乃定

連登

遼東人進士順治四年知順德府歲饑力爲賑救擢山東副使有瞽者數十人當轍臥曰吾輩不能覩公顏色請撫摸以志去思登從之再拜痛哭而去邑人立生祠於北門內六年備兵登州時海氛未靖登勦撫得宜民賴以安捐俸修學而鞠獄尤稱明敏一時有神君之頌卒於官北直山東並祀名宦

趙世禎

開元人順治戊子貢士由沛令歷陞安慶知府均地
丁省徭役捕蝗禱雨皆有實政十年歿于官負無以
殮皖人肖像祀之

于永綬

遼東人順治四年積功任汀州總兵官汀與贛接壤
值金聲桓據江西又土寇竊發環逼郡城四路援絕
永綬帥副將高守貴堅守拒戰汀郡獲全未幾疾作
正衣冠端坐而逝汀人畫像祀之

李率泰

字壽疇瀋陽人有方畧善用兵由勲衛歷侍郎定三
吳下閩越威望素著破李定國復高雷諸州遷兩廣
總督尋改浙閩總督攻取浙舟山克復閩安鎮專督
福建以恩信招徠鄭鳴俊陳輝等康熙二年進勦海
寇克金門廈門諸島官至少保兵部尚書謚忠襄

張朝珍

字玉筍漢軍正藍旗人任湖北巡撫時大兵進勦滇
黔軍務旁午珍不遑寢食造戰船以練水師建浮橋
以渡兵馬運糧進蜀不派民夫歲饑捐賑全活甚衆
以勞瘁卒於官

李棲鳳

字瑞吾奉天人爲諸生時卽以天下爲己任由內院副理事官補東昌荆南二道遷湖廣右藩巡撫安徽所至有政績順治八年以僉都御史撫粵與平靖兩藩先定南韶二郡揚帆直下廣州遂平撫粵八年杜請託絕饋遺省刑薄歛勞來安集粵民賴之十四年加兵部尚書十五年代李率泰總督兩粵平積年巨盜各烏蠻土司及交趾諸郡悉警服歸貢多棲鳳宣慰之功十七年加太子少保次年予告歸卒於家粵人思之祀名宦

朱思義

號奇宇遼東鐵嶺人順治五年任巡海道僉事風裁卓立嚴懲告訐之風兵無縱恣民得安堵後病卒人皆惜之

趙汲

字學先錦州人順治五年田貢生初任盧龍令廉明仁厚前令修學未竣汲慨然自任重修明倫堂櫺星坊及門廊齋舍皆繼成之時部檄召買芻豆赴三屯備行幸羽書旁午民間供應不及汲乃給值鋪商以所收米豆顧運不擾民而公事立濟八年陞泰州

知州擒大盜游三游四等民賴以安疏淤河修學宮
設藥廠代貧民完漕欠州被水災力請奏

聞得蒙蠲恤

祝世昌

遼東人巡撫山西時姜逆作亂世昌力請殄滅凡理
餉數十萬民不見擾事平又請豁賦七百萬石省徭
十餘萬丁卒後巡撫劉宏遇博採輿論謂死忠死事
其義一也並請祀忠烈祠又巡撫馬柱國安集遺黎
申朝紀糾劾墨吏山右至今與世昌並稱焉

徐來麟

奉天人順治五年知平陽府是年姜逆遣叛黨攻平
陽來麟捍禦獲全已而延安王老虎應逆渡河拔汾
州復攻平陽來麟與巡道王無黨叅將范永宗固守
特出銳師擊之擒其將劉光明會大兵至賊解圍走
來麟追斬賊首劉四亨於峪口村餘衆悉潰一時杜
珉以副都統應援而運城獲全總兵李廷壽夜襲竇
村而五臺圍解知隰州王添貴知澤州袁仲選知垣
曲邵起鳳請免脅從之戮功德各遍一邑浮山令安
應麟招降山寇八百餘請豁荒糧數千石凡此皆遼
左人物山右至今思之

郎永清

廣寧人順治六年知渾源州時姜逆初平永清招集流亡詳請豁免逋賦萬餘兩歷山東按察擢湖南布政湖廣開藩南省自永清始也時干戈初靖永清招來撫育民得安堵永寶諸郡溪流悍急歲漕爲艱力請改折湘衡以南舊食粵鹽灘險道遠商民交病申請改食淮鹽至今稱便士民追維遺愛旣請祀於學宮復建崇祠撫臣趙申喬爲記

秦宗堯

義州人順治六年知華州甫下車興新文廟以作士風姜瓖之變宗堯轉輸不擾又大寇盤踞石脆山出沒無常宗堯直搗賊窟殲之州境以寧會 丙召天下賢守令十六人各

賜衣一襲宗堯與焉

王克寬

號南坡漢軍正白旗人少聰穎兼通滿漢文字國初選授尚陽堡四品官凡以罪徙者皆隸焉克寬除科派濟貧苦一時流移之人咸得其所及奉天建郡縣流徙俱赦爲民克寬改授佐領尤善其職常命于國卿建養生堂於東邊門內安置孤貧施粥及棺木

又僱乳母育嬰兒凡受生全之惠者不可勝紀今克
寬子孫世襲佐領科第不絕

韓昌先

遼東人順治間任蕭山令莅事明敏政寬刑簡均里
甲法而詭竊之弊絕至今踵行之昌先卒於官蕭山
建祠祀之

線國安

字爲山寧遠人順治七年從定藩征廣西克先鋒功
最著遂鎮南寧十年李定國擁衆數萬犯桂國安與
陳維新計敗之十七年從東路進師平雲南晉伯爵

仍鎮廣西國安性廉介二十餘年清操如一及卒帑
者數萬人葬於城南之楓林村

趙廷臣

字君鄰鐵嶺衛人明季居山海性至孝父歿三年獨
居不入內室舉明經順治二年知山陽縣時屢經兵
火民多流散廷臣均徭緩賦民以安集丁亥歲饑廷
臣捐金糴粟計口賑之老弱者復按季周給多所全
活逆賊劉二虎與鄖寇王二虎攻山陽廷臣晝夜固
守城賴以全其餘竊發山寇論以大義多受撫又嘗
率騎偵賊爲所傷扶創歸益嚴守禦曰吾爲國守於

身何有山寇王希榮久據鎮安掠縣令拘寨下臺司
檄廷臣往撫卽單騎至賊營宣布威德希榮遂降廷
臣因携前令歸臺司咸器重焉陞江寧同知有趙佛
之稱及轉湖南巡道兵民皆喜曰是趙佛來矣時軍
需旁午廷臣辦治有方事濟而民不擾遇刑獄加意
平反廳事但聞脫械聲行路爲之感泣尤勵清操歲
時酌獻不敢至其門十五年巡撫貴州延見父老博
採旁咨凡所條禁洞悉幽隱定賦額興學校禁貪橫
嚴驅擾種種實政殘黎如出湯火康熙元年調浙閩
總督去之日士民擁道攀號至浙逾年招撫著勲恤

軍愛民以勞卒於官謚清獻

李蔭祖

字繩武遼東鐵嶺人順治間由國學生授民部郎累
官大司馬總制畿輔及青豫二省真定西山久爲寇
據蔭祖諭井陘道副使陳安國入賊巢撫之渠賊高
三出涕泣就撫卒爲勇將十三年晉太保總督全楚
值大兵進滇黔蔭祖區畫有方兵民便之在任四年
以疾告歸卒

賜祭葬崇祀直隸山東河南湖廣名宦

于時躍

字龍州廣寧人順治間由阜城令歷陝西按察使聽斷明允案無積牘一時有于不落店之謠遷湖廣布政順治十年巡撫廣西時桂林初復李定國尙盤據南太等六郡時躡籌兵畫餉六郡以平後交趾黎莫二姓相讐殺時躡宣布德威二姓爭先效順十八年陞總督卒於官

侯世爵

遼東人順治七年以貢知寧鄉縣姜逆之變賊黨衛敏破縣城據之世爵簡卒徒親自督率誓不與賊俱立賊懼委城去世爵招撫流亡閱二年遂有更生之

樂比解組百姓攀轅流涕

蟒吉圖

滿洲人隨征滇黔在鐵鎖橋有功耿逆之變吉圖援粵東以功擢副都統守肇慶會尙之信叛圍肇慶吉圖潰圍北走轉戰二千餘里大小七十餘戰敗韶州叛將張星耀達信豐又破賊將王割耳於城下復會將軍舒恕於贛解南昌之圍捷聞

聖祖仁皇帝嘉其忠勇委以兩粵佩鎮南大將軍印將軍舒恕以下皆聽節制會滇逆圍韶州百計攻之不克吉圖之功也後卒於粵西民感其德祀伏波將軍廟

徐鳳鳴

字祥宇遼東人順治八年知進賢縣壬辰冬土寇闌入境鳳鳴手刃力鬪卻之邑賴以安

馬得功

遼東人累功封三等侯順治十年任福建提督丙申海寇圍會城得功督師解圍遂倍道追擊陸則攻石鼓以扼其鋒水則遮峽江以奪其峽既克閩安鎮乘勝遂復連羅福寧官塘及移駐泉州結營鷺島造巨舟收復沿海十六墟白沙南惠德化安溪等處渠魁以次獻俘建邵汀漳餘寇剪除殆盡以積勞卒於軍

李如桂

瀋陽人順治十年由舉人知紫陽縣時遭兵燹邑治荒殘如桂撫綏遺黎墾田築城修學養士百廢具舉後以僉事提學兩浙稱廉明焉

王國泰

蓋平人初爲福州同知值耿藩潛蓄異謀國泰偵知每達於總督范承謨有先事豫防之智後佐郡泉州與民休息遷本省驛傳道會耿逆甫平海氛尙熾軍興旁午辦應夫船親自給價毫不擾民未幾泉州告警自請召募壯勇得數千人授以衣糧甲仗奮呼擊

賊賊遂大潰泉圍解叙功增秩擢安徽按察使
宜永貴

遼東人順治十二年撫閩越明年病瘳海寇猝薄城
下時大師悉赴清漳城中騎士僅數十永貴力疾率
士庶登陴每梁守以一壯丁十梁領以一庠生每門
以縉紳數人督之永貴晝夜拊勞與城守玉鑿合力
固守起廢弁田勝等令領騎兵易服更番分出七門
接戰每多殺獲寇三薄城皆計却之嘗坐射烏樓寇
悉衆來攻炮仆侍役永貴神色不動指揮自若捍禦
匝月發大炮殲其渠魁圍乃解

吳興祚

號留村遼東清河人漢軍正紅旗籍順治十二年由
貢生知大寧縣縣介萬山中經流寇蹂躪民多轉徙
學宮鞠爲茂草興祚招比勸墾興學養士不再耨民
復舊業寢聞絃誦聲再任無錫令無錫最號繁劇前
任多以罪廢數十年無遷擢者興祚至尙有前令數
人虧空未完拘寄追比興祚心念數令囊已如洗拘
之何益寧爲代賠俾得歸鄉井耳因設祖席具贐儀
延數令至告以代完虧空已出印結諸公可卽作歸
計無久淹此也數令皆感泣而去在任數年以治行

報最超擢福建按察陞巡撫加兵部尚書首薦臬司永寧于成龍世號知人時耿逆雖平海氛未靖與祚留意戎行識拔將材總督標下藍理過誤將刑與祚一知其忠勇可用緩頰爲開生路理後果以拖腸大戰蒙

聖祖仁皇帝獎賚優擢顯職理成舊恩繪與祚像奉之姚啓聖平海與祚與之協謀取金門廈門功加世襲一等精奇尼哈番晉粵督調山西右衛副都統從征厄魯特卒於軍與祚篤念親故其先世爲紹興人與祚既責捐金修族譜增置祭田義塾族中凡殘處者皆與

瞻養之資親舊及聞名投謁者均有資給素善書精詩律所著有宋元聲律選及史遷句解行世

許世昌

字中軒遼東人初按江西興利除弊冤獄多所平反康熙元年巡撫福建先是海寇陸梁沿海諸郡製造戰船火炮世昌慮部議核減浮價勢必分派民間遂具疏力請准銷又請代完紳衿逋負免其解部究追又請蠲順治十三年以前牛角等稅加價一十餘萬免民屯久荒田糧六十餘萬又給遷界窮民牛種勸令開墾復捐俸委官於七門及近郊各處賑粥施藥以

濟遷民之饑疫者時有萬姓饑病仁天活命之謠

王世臣

正紅旗蔭生襲三等阿達哈哈番順治十六年隨征湖北累著戰功駐防潮州時蘇利犯順世臣隨將軍王安國與賊戰於石井寨親冒矢石戰方酣又以奇兵繞出賊營勝之降其餘衆潮郡悉平擢粵東副都統以疾終

張所志

漢軍正黃旗人貢生順治十七年巡按四川陳收拾全川至計章數上多見 採納康熙十二年任山西

驛糧道以廉介爲屬吏倡及護藩篆令自封投櫃地

方便之後陞福建按察使遇冤獄立爲昭雪時用兵海上督造船艦趨運軍需以功擢江西布政使大有政聲

周維新

遼東人以副都統駐鎮江廉靜和易鎮撫兵民禮敬十大夫八年卒於官鎮人懷之

于宗堯

字二巍廣寧人年十九以蔭補常熟令勇於爲治興利剔弊雖老吏弗能及邑素苦於漕宗堯視事三月

盡除其害三年卒於官邑爲罷市男女巷哭醵金治其喪負販者皆投一錢樞將歸百姓遮道留之葬虞山南麓題其阡曰萬民留墓瞿式鼎捨宅爲祠在慧日寺西

余三汲

遼東人初任黃州府同知秉公廉舉百務歷任按察司轉粵藩清操彌著

白登明

字林九蓋州人知太倉州立衙蠹地棍賭博奸淫四禁犯者必置之法境內肅然奸民某通寇事覺總督

檄州捕之某袖出一狀言某某皆其黨凡州中巨室

富家無或遺登明知其誣笑曰若欲生乎死乎對曰欲生登明日若非寇何知某某皆寇黨以若狀上死無赦矣某感慙遂燬其狀登明代爲申辨州之大姓皆獲全州自劉河埭寨歲苦旱潦登明乃先濟朱涇後及劉河凡六十里州及崑嘉二邑咸賴其利
申我抱

遼東人由光化令遷知華州下車二十六日革弊懲奸不遺餘力卒時華人遮道哭奠相傳我抱死爲城隍屢示靈異州人比之柳州羅池云

王國光

奉天人世襲歷任侍郎改都統廉潔果斷嚴於詰盜有違坐保甲承審之法康熙六年海盜蘇利叛加鎮海大將軍討之兵不血刃鯨鯢授首人擬其功於韓

范云

麻勒吉

滿洲人崇元及第康熙十年總督兩江莅任數旬蝗蝻四布麻勒吉倣古埋蝗之法行之遂不爲害凡利弊所在莫不振刷大綱小紀皆有規矩可守士民擇其尤要者二十八條勒去思碑於雨花木末山下又

立二祠一在學宮一在聚寶門外

吳殿弼

字聖襄自在州人父三元順治乙酉舉人仕至遵義知府性廉介不苟合滇藩知其名欲與通譜三元終不答及滇藩敗諸通譜者皆得罪人始服其卓識殿弼以貢生効力軍前隨征水西積功授大姚令再補慈谿值大嵐山劇寇龔萬里時出剽劫殿弼與鄰近四縣團練鄉勇會勦之於寇平鏡甲衣糧殿弼多日捐備在慈十年雖征調浩繁旱疫頻仍而案無冤牘境無流殍旣陞松江郡丞邑人追思崇祀名宦

石珍

字璜公滿洲人鎮海大將軍廷柱之子廷柱順治年間駐鎮江有石佛之稱珍以蔭歷官江鎮道廉靜慈惠與民休息尤以振興教化爲急革弊興利不憚勞瘁卒於官士民哀輓得詩數百章共指貨建祠祀之

金光祖

滿洲人康熙元年任福建右藩除暴興利四民以和二十年滇黔煽亂光祖誓師進討信實無私士爭用命光祖歿士民請祀澤宮

楊奇烈

蓋州衛人弱冠知沂州有聲遷登州守康熙二十一年分守登州道會于七之變總督祖澤溥親率大兵進討奇烈外撫流移內供軍旅官民賴之賊平得交通書對衆付之火人情遂安督帥以賊首逋逃朱橋下徐二村多賊親黨欲縱兵焚勦奇烈願以家屬保二村之民遂得解今登萊兩郡俱建有感恩祠

郎廷相

字鈞衡廣寧人康熙三年任四川布政招撫流移措置牛種曉諭耕墾秦楚吳越接踵至者千萬餘人遂勸農興學更創貢院百廢具興八年遷豫撫遠近老

幼遮道號泣十五年任閩督時耿變初定餘孽紀朝
佐張八等尙聯營數十里廷相勦撫兼施旬月間次
第悉平及卒閩蜀兩省並祀各宦

于成龍

字振甲鑲紅旗人康熙七年由廕生任樂亭令首嚴
苛派歲饑請賑實惠均沾繕城垣除積弊政通事舉
以署灤篆註誤士民請留十年復任由是修學宮勸
開墾革里催詳除美化市額糧以恤丁絕請退任卹
縣撥補地畝以免賄累禮賢愛士緝盜安民十八年
陞北通州知州以于靖端薦遷江寧知府擢江南按

察使二十四年陞授直隸巡撫如改徵狐皮折色停
止灰車協運革除芝蔴花絨雜派善政不可枚舉所
薦彭鵬邵嗣堯後皆陞官清要政聲懋著世以成龍
有知人之明歷河道總督加兵部尙書兼左都御史
卒謚襄勤

姚啓聖

其先浙江紹興籍後爲正紅旗漢軍人康熙癸卯鄉
試第一名始任香山縣註誤去官十三年耿逆作亂
起爲粵東郡佐遷溫處道隨大師平閩爲福建布政
輕徭薄賦與民休息而持籌斲鑰吏斂手莫敢爲奸

嘗自備衣糧招募壯勇有澄清海外之志或謂公文
臣無事此啓聖掀髯笑曰若以文武爲二途耶彈丸
海島我將爲

國家平之十七年擢總督遂毅然以平海寇爲事移駐
漳州開招徠館厚賜降附以昭寬大十九年二月乘
賊懈遣兵攻破練洲馬洲石碼等十九寨又調他將
恢復海澄乘潮分渡直入海門等處先後降其衆萬
五千有奇遂復金門廈門賊窮蹙退保澎湖啓聖知
泉人施琅熟嫻水戰深悉海上情形疏請授爲大帥
二十二年六月與琅決策從平海進兵克澎湖七月

偽藩鄭克塽率衆歸誠啓聖晉宮保予世職隨題請

海界遷民俾復舊疆又捐俸置通省郡邑學田供貧
士膏火尋以病卒於官士庶悲思建祠於洪江許祀
之方啓聖初議平海賊遣偵者數輩覘動靜啓聖故
示以暇豫會元夕令百姓張燈自與文武大僚置酒
還珠門樓上漏下二鼓忽稱疾令屬吏行酒啓聖已
開南關疾馳三百里至五虎門調將出師矣在漳州
日引數騎招搖城市見廣廈輒盛設供帳榜其門曰
某鎮公館某將軍行臺每獲賊偵則伴曰汝非某將
軍人乎歸語將軍某日之期不可失予酒食遺之以

故賊自相猜忌納款之計遂決

費揚武

正白旗滿洲人十五歲襲三等伯康熙十四年雲南出征取長沙有功後以內大臣撫遠將軍兼攝右衛建威將軍康熙三十五年統滿漢兵出殺虎口與大同總兵康調元殺虎口協鎮王元登天山過瀚海直抵招磨多地方征厄魯特噶爾丹飲藥死大敗賊兵陞爲一等公奏設歸化城鎮撫邊徼功最著卒謚襄莊今歸化城爲建專祠奉若神明

王鑄鼎

字象九瀋陽人例監康熙十三年任臨海令時寇盜

竟斥授師雲集鑄鼎親冒矢石辦餉築屯有防禦功

寇退祈賑籲蠲民賴蘇息又立催科之法止查花戶

完欠除去現年圖差以積勞卒於官

常文魁

字月生漢軍正藍旗人康熙十五年由貢生在永平

知府治政精勤歷事敏練折獄不費繁言兩造俱服

向者旗丁與投充肆橫文魁至咸知守法初謁

文廟見聖宮傾圮卽鳩工修葺凡祠廡門坊悉心經理

櫺星門前添設石坊石柵週圍繚垣三百餘丈及明

倫堂東西齋房創建書院及魁星樓武學龍王占祠
皆加修整未及一載次第告成雖有勸助而公之所
捐實過半矣又嘗修補郡乘冀續宋公琬換後之缺
亦足徵留心文獻之雅意云

王之佐

號燮庵廣寧人國學生康熙十六年調寧化令時耿
變初除海氛尚熾漳師十萬日餉千斛寧化運夫五
百人月一踐更之佐以免夫上請督撫許之有黃機
者乘甲寅逆變以偽劄陰東諸鄉之佐請兵督撫許
譟三鎮趨寧化倏又調兩鎮援同安之佐按止三帥

飛書返檄聲淚俱落督撫鑒其誠聽其調度乃率兵
攻賊壘賊首投誠江右得檄使還寧招舊部之佐堅
不奉檄絕其歸路數十年通寇遂為獸散後以寒疾
卒於軍

張仲德

奉天人康熙十七年任廣東藩司明決幹濟時南部
一二郡盜起軍興旁午仲德運籌有方凡所輸將上不
虧賦下不病民盜平招流亡墾荒畝地方諸弊盡革
除之粵俗輕生多服毒草奸徒藉為奇貨仲德嚴行
禁飭刁風乃寢卒於官祀廣東名宦

王育賢

遼東人康熙十七年分守興泉道六月海寇圍泉育賢集衆登陴不解甲者四旬聞援師至單騎遍慰父老人皆感泣圍解後竟以積勞卒於官哭臨者數千人迎櫬哀奠者數十里設木主於崇陽樓下祀之一時有巡海道張翼鵬消釋反側復難民五千餘家汀漳道阿琳懲奸散賑培育學校驛傳道王國泰募壯勇數千人解泉州之圍並載福建名宦閩人至今猶思之

李士正

字毅可奉天人舉明經歷江西巡撫時藩帑方息士正刊寬大之政二十四條兵民遵守氣象一新及撫粵嚴海防戍要害捕花山沙潭諸盜

題請建縣今花縣所自始也又葺

文廟建三賢祠修青雲橋士正九任外吏歟歷詣練在粵六載勲績尤著旣卒人思其功俎豆於五仙門外楊允和

號育庵遼東人康熙間知安遠縣歲饑設法賑濟全活者以萬計邑俗旣莖屢遷名曰檢金允和著木鐸餘音刊布之陋習始革創製龍骨小車厚水以漑山

田至今民沿其法又立義學延師教授士風大振
遲維城

廣寧人康熙十九年任華陰令嚴禁刁風獎拔善類
建朱文公廟於華山春秋奉祀二十二年奉調各路
兵馬回陝值大風雪維城疾趨至關畫轉運策人無
凍餒軍民雨便累官至福州知府先是閩俗妄傳五
瘟神降災以端午爲神誕日請香設宴謂之所禱於
每歲四五月金鼓喧闐奔走若狂謂之禳災維城力
請禁止氛藹頓息又詳請於府公捐囚米併給醫藥
柰湯又立治水法擒治匪類之乘機搶奪者病卒於

官士民請祀名宦

許弘勳

字無功遼陽人廉靜有大度初知紹興府蒞任一月
值閩逆竊發越屬暨乘新三邑奸民嘯聚圍攻郡城
弘勳夜率兵出殲縛渠魁慰散其黨郡境得安累遷
雲南按察使康熙二十七年楚北兵譴滇卒張麻不
構亂期以三鼓發弘勳知其謀白督撫徹夜無三搗
捕斬亂首數人兵民帖然

孫毓珩

奉天人康熙二十二年令新城潔已奉公杜絕請記

興學禮士翊善鋤惡每朔望率師生里民詣公所宣講

聖諭再四諄復一時士民多化之新邑山峻地狹水源易涸

毓珩修建堰壩以便蓄洩又相永昌形勢開渠引水
沾溉一鄉民因號爲孫公堰西關火毓珩叩天祈止
火遂息遇亢旱曝赤日中步行數十里雨立沛卒後
士民肖像祀之至今昇像禱雨無不應者

石琳

字瑯公開國元勲忠勇伯之第六子也康熙三十五年東粵饑琳任兩廣總督通糴散賑存活甚衆瀧江
隄潰琳刑馬沉玉禱於江躬負薪塞隄水卽退四十
年決黎讞於瓊南殲渠魁釋株連民用大寧在粵十
四年革私稅恤獄囚嚴海防重文行禁鬻女流風善
政美不勝書及平徭於八排染瘴卒百姓巷哭聲聞
遠近皆肖其貌而祀之

王永名

漢軍正紅旗人由例監授三水縣康熙二十四年割
南海番禺地置花縣永名適至遂調補焉地多叢篁
鳥道爲賊淵藪永名鑿山埋谷築城浚隍立學宮招
流民授屋墾田盜遂衰息卒於官祀名宦

王光開

鑲黃旗人康熙三十五年知嚴州府蒞任卽留心民瘼丁丑歲旱米價騰貴光開捐俸倡糴減價平糶紳衿富室感發興起廣運接濟民賴以生郡有妖狐作祟居民多受其害光開爲文檄告城隍妖狐滅跡被害者死而復生遠近稱異後卒百姓老幼奔哭易服三日罷市輟耕

鐵範金

字式之承德縣人性至孝母疾篤範金親侍湯藥衣不解帶一夕母忽昏絕範金以暮夜難於延醫遂割腕肉以進母立甦丁丑範金成進士選庶常授翰林院檢討陞江南學院未至卒

劉德健

字子恒錦縣人由舉人任西隆知州廉能有威惠後從征土苗委辦軍需緩急無悞旣積勞復染瘴癘遂卒於軍事

聞優恤給歸櫬銀五百兩

盛京通志卷之三十四

盛京通志卷之三十五

孝義

自古孝義之風根於天性豈以爲名哉然主持倫教者表揚恒亟亟焉所以旌前而勸後也漢唐以上遼地僻遠孝子悌弟忠臣義士史或未詳遼金而後以及

國朝則班班可考矣網羅前史摭採舊聞或核實以定名或闕疑而見慎蓋事關

國典祠立學宮紀載未敢忽也

三國

一王簡

元菟郡高顯縣民也吏民叛令長熙為賊所殺簡負
熙喪星夜行致本州魏正元二年詔以簡忠節可嘉
特拜簡為忠節都尉以旌殊行

晉

李信

襄平人父敏避公孫度乘輕舟浮滄海莫知所終信
浮海出塞遍求不得欲行喪制服則疑父尚存欲終
不聘娶燕國徐邈又以不孝莫大無後勸乃娶妻既
生子允遂遠房帷如居喪禮悲鬱數年而卒

南北朝

晁清

遼東人祖暉魏濟州刺史潁川公清襲爵例降為伯
戍守梁城梁師攻圍糧盡城陷清抗節不屈見殺贈
樂陵太守謚曰忠

高敬猷

遼東新昌人道悅子元魏授給事中奉車都尉蕭寶
夤引為驃騎司馬及寶夤叛敬猷與封偉伯等潛圖
義舉謀泄見殺贈滄州刺史

遼

耶律撻不也

字撒班清寧九年平重元之亂以功爲懷德軍節度使大康三年授北院宣徽使耶律乙辛謀害太子撻不也知其姦欲殺乙辛及其黨乙辛誣搆撻不也與廢立事殺之乾統間追封漆水郡王繪像宜福殿敖盧幹

天祚皇帝長子甫髻黻善馬射性樂道人善而矜人不能及長積有人望天祚失德臣下謀立之敖盧幹實不與知事覺或勸之亡敖盧幹曰安忍以葢爾軀矢臣子之節遂就死聞者傷之

耶律愛奴

太安十年爲敦睦宮太師敵烈等部來侵愛奴及其子死之

張寶

錦州民四世同居道宗嘉之令其子爲三班祇候明錦州有張寶者亦四世同居

蕭酬幹

字訛里天慶中召爲南女直詳穩遷征東副統軍是歲東京叛遇敵來擊師潰獨酬幹率數十人力戰沒於陣追贈龍虎衛上將軍

耶律中

天慶中召中爲五院都監中謂妻蕭接蘭曰吾本無宦情今不能免當以死報國汝能從我乎對曰謹奉教及金兵徇地嶺西盡徙其民中守節死接蘭亦自殺

耶律佛留

天慶四年女直軍潛渡混同江掩擊遼軍佛留爲副都押衙與崔公義邢頴蕭葛十等皆死之

李維訛只

遼陽人爲桂州觀察使高永昌據東京率衆力戰不

勝死之

耶律丑哥

仕至都統遼亡不屈夫婦俱死金主憫其忠義授其子忒末爲都統

金

胡沙補 撒八

胡沙補完顏部人從太祖破寧江州達魯古城皆有功初高永昌僭號東京改元隆基遼主遣人招之不從至是永昌請和於金金使胡沙補招之永昌詐降於幹魯幹魯使胡沙補撒八往報會有言永昌非真

降者幹魯乃進兵永昌怒將殺胡沙補沙補神色自
 若罵永昌曰汝叛君逆天今日殺我明日及汝矣永
 昌益怒遂并撤八支解之天會中胡沙補撤八俱贈
 遙鎮節度使

特虎雅

撻瀾水人軀幹雄偉敢戰鬪攻照散城特虎雅先登
 敗之自臨潢班師至遼河余睹來襲婁室已引去特
 虎雅獨殿馬憊乃步鬪婁室與數騎奔救雅止之曰
 我以一死捍敵公來俱斃無益遂沒於陣皇統間追

贈明威將軍

按金史列傳中止云特虎雅而序名處則云特虎雅其中必有一誤

僕忽得 酬幹

僕忽得宗室子初專國相撒改從伐蕭海里有功與
 酬幹俱招降燭俚水部族僕忽得領行軍千戶從破
 黃龍府戰達魯古城皆有功酬幹亦宗室子年十五
 隸軍中魁岸善戰以兵五百敗室韋獲其民衆及招
 降燭俚水部以功爲謀克天輔五年僕忽得同酬幹
 往鼈古河籍軍馬燭俚水部實里古達等七人殺酬
 幹僕忽得投尸水中太宗遣使弔賻天眷中贈僕忽
 得昭義大將軍酬幹奉國上將軍
 粘割韓奴

初太祖入居庸關遼林牙耶律大石自古北口亡去以其衆來襲奉聖州爲婁室所擒旣而復亡去不知所往天會二年遼詳穩撻不耶來降言大石稱王北方皇統四年詔韓奴奉使入其境大石方適野與韓奴相遇問韓奴何人乃敢乘馬猝下使跪韓奴罵曰反賊天子不忍於汝加兵遣招汝降汝縱不能面縛請罪敢辱天子使乎大石怒殺之世宗嘉其節贈昭毅大將軍

溫廸罕蒲睹

爲兀者羣牧使西北路契丹撒八等反諸羣牧皆應之蒲睹聞亂選家奴材勇者數十人給兵杖爲備賊不得發乃給諸奴曰官閱兵器願借仗應閱奴仗旣借賊至無以禦蒲睹被執不屈賊斃殺之子孫皆與害

鶴壽

鄆王昂子五院部人時老和尚率衆招鶴壽反鶴壽曰吾宗室子受國厚恩不能與賊俱反遂與二子皆被殺

訛里也

契丹人爲尚廐局直長大定初招諭契丹窩斡叱令

跪見訛里也不從曰我朝廷使也豈可屈節於汝汝等早降可全性命若大軍至悔將何及窩斡怒曰汝本契丹人而不我從敢出是言乎遂殺之大定三年贈訛里也宣武大將軍

溫廸罕移室邁

上京人性忠正強毅善射膂力過人皇統初襲其兄謀克積戰功爲洮州刺史兄子旣長以謀克讓還之除貴德州刺史正隆四年大徵兵南伐泰州猛安定遠阿補以所部叛還移室邁擒之契丹反敗會寧六猛安於締母嶺屯韓信二州之境移室邁破之於伊

改河以功遷臨潢尹窩斡反領兵數萬攻臨潢移室邁以六百人邀擊數接戰剽殺甚衆所乘馬中流矢而仆爲賊所執迫脅至城下使招降移室邁厲聲曰汝輩慎勿降賊賊無能爲也賊怒殺之城中人感激乘城固守賊不能克

盧亨嗣

字繼祖臨潢人盧彥倫之孫也初由祖廕得官以課最遷至定遠大將軍莒州刺史亨嗣與弟亨益盡友愛之道大定十六年父璣爲同知宣徽院事當廕子亨嗣以讓弟亨益亨益早卒子焜焜幼稚亨嗣盡以

舊業田宅奴畜與之

翟吳

貴德州人明昌元年詔賜吳絹十疋以旌孝行事實未詳

劉慶祐

錦州人有孝行明昌三年詔賜慶祐絹粟旌其門閭復其身

石抹元毅

本名神思咸平府路謀克人爲大理知法省錄陝右五路刑獄無冤人復委受宋歲幣故事有私遺物元毅一無所受明昌初爲大明等路提刑以最遷汾陽軍節度副使時石嵐間賊黨嘯聚元毅滅之二境以安遷同知武勝軍節度使有別郡疑獄久不決元毅一訊卽服河東北路田多山坂舊盡定上賦元毅奉朝命相地以三壤法平之民賴其利歷撫州刺史會邊將失守元毅率吏卒出州經畫軍餉猝與敵遇州倅及從吏堅請還元毅曰我輩任邊守遇敵而奔何面目見朝廷乎衆感其忠爭爲効死鏖戰久之以衆寡不敵遂遇害贈信武將軍元毅性沈厚武勇過人每讀書見古人忠義事嗟嘆賞慕喜動顏色子世勣

後登進士奏名之日上謂宰臣曰此神思子耶嘆賞久之

伯德梅和尚

泰州人性鯁直尚氣節正隆五年克護衛累遷復州刺史明昌六年移鎮崇義軍時有事北邊左丞相夾谷清臣行省於臨潢檄爲副統會敵入臨潢梅和尚及護衛關合土等逆擊之敵積陣以待梅和尚直擣其陣殺傷甚衆敵知孤軍無繼聚兵圍之度不能免乃下馬相背射復殺百餘人矢盡猶以弓提擊爲流矢所中死詔贈龍虎衛上將軍以其子都奴爲軍前

猛安

黃摑九住

臨潢人明昌間知彰德府事元兵至戰沒贈榮祿大夫南京留守

夾古胡剌

上京宋葛屯猛安人以戰功襲父謀克正隆末山東盜起胡剌爲行軍猛安遇賊千五百人於徐州南敗之又以騎兵三百二十敗敵千五百人於宣化鎮僕散忠義軍伐宋胡剌領萬戶由泗州進戰歿於陣贈鎮國上將軍

鄴陽 完顏石古乃

鄴陽宗室子爲符寶祇候至寧元年紇石烈執中作亂變起倉卒鄴陽與護衛長完顏石古乃召大漢軍五百人赴難與執中戰於東華門外死之詔贈鄴陽宣武將軍順天軍節度副使贈石古乃鎮國上將軍順州刺史

徒單航

一名張僧全寧元年爲安州刺史元兵至城下航謂民曰我家兩世駙馬受國厚恩決不可降汝輩計將安出民曰太守不屈我輩願以死守航盡出家財犒軍民軍民皆盡力備禦又五日度不可支乃先縊其妻孥謂家人曰我死卽撤屋焚之城破人猶力戰曰太守旣死我輩不可獨降死者甚衆

夾谷守中

咸平人本名阿土古由進士歷通遠軍節度使至寧末移彰德軍未行夏兵數萬入鞏州守中禦之兵少不能支城陷獨不屈夏人壯之且誘且脅守中益堅遂載而西至平涼要以招降府人守中佯許至城下呼曰外兵矢盡且遁矣慎勿降夏人交刃殺之詔贈資善大夫東京留守

納蘭綽赤

咸平路伊改河猛安人契丹括里使人招之不從以兵據改渡口賊月餘不得進旣而括里兵大至遂見執斃而殺之贈官兩階二子皆得廕敘

烏古孫兀屯

上京路人明昌七年充萬戶備邊有功除歸德軍節度副使改盤安軍察廉遷同知速頻路節度使遷唐州刺史泰和六年宋皇甫斌來侵連却之詔遷兀屯同知河南府事爲右副元帥完顏匡右翼都統大安初遷昌武軍節度轉上京留守大安三年以兵三千

入衛中都遷元帥左都監兼北京留守貞祐元年以兵入衛中都詔以兵萬六千人守定興軍敗兀屯死之

高錫

字永之德基子以廕補官積勞調淄州酒使課最遷萍鄉令察廉遷遼東路轉運度支判官歷北京遼東轉運副使貞祐初仕至河北東路按察轉運使元兵破城自投城下死之

高守約

字從簡遼陽人大定二十八年進士累官觀州刺史

元兵徇河朔郭邦獻已降偕至城下呼守約曰當計全家室守約弗顧城破被執不屈死贈崇義軍節度使諡忠敬

移刺古與捏

安化軍節度使貞祐初元兵取密州力戰死贈安遠大將軍

烏古論仲溫

蓋州按春猛安人大定二十五年進士累遷上京東京等路按察司事改提舉肇州漕運貞祐初爲鎮西軍節度使時中都城圍遂至太原移書安撫使賈益

謙約以鄉兵馳救不能進抵平陽仲溫嘗治平陽吏民爭留之仲溫曰平陽巨鎮易爲守禦於私計得矣如嵐州何遂還鎮已而元兵大至城破不屈死贈資德大夫婆速路兵馬都總管諡忠毅歲時致祭完顏九住 唐括孛果速

九住宗室子爲武州刺史孛果速爲軍事判官貞祐二年元兵取九住子姪抵城下招九住曰不降且殺之九住曰當以死報國遑恤家爲城破與孛果速俱力戰死詔贈九住臨海軍節度使加驃騎上將軍孛果速建州刺史加鎮國上將軍歲時致祭

王維翰

字之翰北京路利州龍山人大定二十八年進士調
貴德州軍事判官察廉遷永霸令健訟衰息歷弘政
獲嘉令佐胥持國治河決遷一階改北京轉運戶籍
判官同知保靜軍節度使檢括戶籍一郡稱平貞祐
初轉定海軍節度使舟行遇盜維翰呼謂之曰爾輩
本良民因亂至此財物不惜勿恐吾家盜感其言而
去至鎮無兵時敵騎充斥鄰郡皆望風奔潰維翰謂
吏民曰孤城不可守此州阻山浮海當有生地無俱
爲魚肉也乃縱百姓避難維翰率吏民願從者奔東

北山結營堡自守力窮被執不屈死之贈中奉大夫
陀滿斜烈

咸平路猛安人襲父職承安中討契丹有功歷遷知
彰德府事貞祐四年元兵復取彰德斜烈死之
從坦

宗室子大安中充尚書省祇候郎君貞祐二年自募
義兵數千充宣差都提控應援中都上書曰絳解二
州僅能城守而村落皆嘗被兵重以連歲不登人多
艱食皆恃鹽布易米今大陽等渡皆不許粟麥過河
願罷其禁從之興定元年權河平軍節度使經畧孟

州是時諸路兵皆入城自守百姓耕稼失所從坦上書曰養兵所以衛民方今惟真定河間之衆可留扞城其餘府州皆當散屯以爲民防俟稼穡畢然後移於屯守之地是爲長策從之興定二年與參知政事李革守平陽元兵破城從坦自殺贈昌武軍節度使移刺阿里合

蒲察婁室

遼人興定間累遷霍州刺史治好義堡元兵至力戰不支與保昌節度副使孔祖湯俱被執元人脅之降阿里合曰吾有死無二叱使跪不屈散矢射殺之贈龍虎衛上將軍祖湯亦以不屈死

蒲察婁室
東北路按出虎割里罕猛安人泰和三年進士調慶都牟平主簿以廉能遷中都右警巡副使興定二年同知河中府權元帥右都監復取平陽晉安遙授孟州防禦使將兵救鄆州轉戰而至城破死之贈資德大夫定國軍節度使諡襄勇

兀顏訛出虎

隆安府猛安人大定二十八年進士遷汾陽軍節度使興定二年城破死之

女奚烈資祿

咸平府人本姓張氏興定元年官西寧州刺史賜以
姓資祿久在行陣御下有法五年授金安軍節度使
救麟州城破不屈死之贈銀青榮祿大夫中京留守
完顏訛可

元光初爲同州節度使元木花黎取同州訛可死之
完顏賽不

始祖弟保活里之後也狀貌魁偉沉厚有將畧泰和
二年任胡里改路節度使僕散揆伐宋爲右翼都統
屢有戰功正大元年拜平章政事四年吏部郎中楊
居仁上封事言宰相宜擇人哀宗語大臣以爲此非

吏曹所宜言賽不進曰天下有道庶人猶得致言况
在郎官陛下有寬弘之德故不應言者猶言使其言
可用則行之不可用不必示臣下也上是之哀宗遷
歸德賽不爲右丞相樞密使封壽國公扈從至歸德
請致仕二年復詔行尚書省事於徐州時蔡已被圍
徐州將士以朝命阻絕議降元賽不先病疽久不視
事至是恐被執投河求死軍士援出之卒自縊叛將
麻琮乃以州降元

完顏斜烈

一名鼎字國器系出蕭王完顏彝之從兄也年二十

以善戰知名貞祐中彝爲元兵所虜母留豐州斜烈
事之甚謹彝在北大帥甚愛之歲餘托以省母乞還
大帥以卒監之至豐斜烈乃與彝劫殺監卒奉彝母
南奔旣而失馬載以鹿車兄弟共挽南渡河宣宗奇
之斜烈以世官授都統未幾行壽泗元帥府事以彝
自隨斜烈辟大原王渥爲經歷使彝師友之正大二
年斜烈爲總領屯方城以彝自隨軍中事彝皆得預
斜烈病軍中李太和與方城鎮防軍葛宜翁相毆訴
於彝彝知宜翁事不直量笞之宜翁死其妻訟之官
彝久繫獄斜烈入朝哀宗怪其瘦問卿寧以方城獄
未決故耶吾今赦之矣未幾斜烈卒上聞使馳赦彝
曰有司奏汝以私忿殺人汝兄死失吾一名將今以
汝兄故曲法赦汝他日汝奮發立功名始知我不妄
赦矣彝後卒爲良將死於難初斜烈自壽泗元帥轉
安平都尉鎮商州威望甚重敬賢下士有古賢將風
一日搜伏於大竹林中獲歐陽修子孫詢得其實併
其族屬鄉里三千餘人皆縱遣之

陀滿胡土門

字子秀正大末由策論進士累官翰林待制貞祐三
年爲臨洮總管夏人入寇圍城胡土門夜出襲賊壘

夏兵大亂遂遁去興定二年遷元帥左監軍兼知晉安府河東南路兵馬都總管繕甲兵積芻糧以備戰守正大三年復爲臨洮府總管城破被執誘之降不應使之跪不從以刀亂砍膝脛終不屈遂見殺詔贈中京留守立像褒忠廟

撒合輦

字安之宗室子正大四年元滅西夏進軍陝哀宗召羣臣同議西事多主和獨輦力破和議初宣宗改河南府爲金昌府號中京至是遂以輦爲留守九年元兵圍城同知幹朶羅賚金帛出北門巡城爲犒軍之具既出沿城而西直出外壕城上人呼曰同知講和去矣軍士及將領多隨去輦傳令同知叛降有再下城者斬乃定時輦疽發背力疾巡城妻獨吉氏縊於室輦自外至慟曰夫人不辱我我肯辱朝廷乎城東北角破輦奪南門出不得投壕死

史載其死節頗詳春秋之義善善欲長故特表其忠

按金史陳規言撒合輦諂佞納賄而

赤盞尉忻

字大用上京人性至孝當襲父謀克不願受職登明昌五年策論進士丞相高汝礪嘗薦其有宰相才元光二年參知政事編修國史正大元年拜尚書右丞

哀宗欲修宮室尉忻極諫至以卧薪嘗膽爲言哀宗
悚然從之五年致仕居汴中崔立之變明日召家人
付以後事望睢陽痛哭自縊死

完顏忙哥

忙哥系出蕭王叔父益都節度秦州爲元兵所攻適
病不能軍忙哥爲提控獨當一面兵退而益都死忙
哥以城守功世襲謀克收充奉御崔立之變忙哥義
不受辱與妻溫特罕氏並縊

烏古孫奴申

字道遠由譯史入官性伉特有直氣爲監察御史時
中丞完顏直家以酷烈聞奴申糾罷之哀宗東遷爲
諫議大夫行省左右司郎中留汴京居守崔立之變
自縊死於臺中

完顏珠顆 裴滿阿虎帶

珠顆字仲平由進士歷戶部尚書阿虎帶字仲寧由
進士歷御史大夫崔立之變皆死於難

內族思烈

南陽郡王襄之子也資性詳雅頗知書史自五六歲
入宮充奉御及宣宗入承大統胡沙虎跋扈思烈尚
在齟齬嘗涕泣抱帝膝曰願早誅權臣以靖王室帝

自是深器重之天興元年以思烈叅知政事思烈自
南山領軍民十餘萬入洛行省事二年元兵自汴圍
中京崔立遣人監思烈之子於東門下招之使降思
烈不顧令軍士射之既而知崔立以汴京歸元憤怒
發病死

完顏素蘭

字伯揚至寧元年策論進士貞祐初累遷應奉翰林
文字權監察御史宣宗遷汴素蘭諫以爲宜留太子
重聲勢繫人心爲高琪所阻不從既至汴又上書以
爲宜親君子遠小人大明黜陟以革東海之政又言

國家不可一日無兵兵不可一日無食軍官宜加精
選徒務多置妄耗糧儲臨敵亦未可恃皆不能用時
高琪秉政惡儒喜吏上下苛察素蘭首攻琪惡謂琪
變亂紀綱戕害忠良上以素蘭屢進直言命再任監
察御史正大七年出爲金安節度使兼同華安撫復
召還朝至陝被圍久之亡奔行在道中遇害素蘭蒞
官修謹每進言多有補益其居父喪不飲酒廬墓三
年時論以爲難

完顏婁室

內族也正大中爲鷹揚都尉八年慶山奴棄京兆適

婁室運軍器至白鹿原遇元兵與戰兵刃既盡以絛繫掉金牌力戰死

按金有三婁室皆內族時以其名同以長幼別之戰死者大婁室也

古里甲石倫

隆安人以武舉登第剛勇善戰宣宗每任用之貞祐四年知延安府兼鄜延路兵馬都總管元兵圍忻州石倫率兵往援以兵護其民入太原所全軍民甚眾正大八年權昌武軍節度使元兵至城下使人招降石倫即斬之既而偏裨輩開門降石倫投解後井中死之

移刺蒲阿

契丹人正大七年權叅知政事同完顏合達行省事於闐鄉哀宗九年三峯山之敗蒲阿走京師未至元兵追擒之械至官山召問降否往復數百言但曰我金國大臣惟當金國境內死耳遂見殺

完顏兀論

賽不之姪正大九年自徐引兵入援將趨歸德行次楊驛店遇小乃解軍遂潰兀論戰死

慶山奴

字獻甫內族人儀觀甚偉貞祐初遷武衛軍副都指揮使兼提點近侍局胡沙虎專權僭竊嘗為宣宗言

之後胡沙虎伏誅慶山奴愈見寵任興定元年擊敗元兵於寧州進元帥府左都監三年連敗夏兵賜金帶正大九年與元兵戰馬躓被擒見史天澤曰吾國已殘破公其以生靈爲念及見大帥忒木鐸誘之使招京城不從又偃蹇不屈左右以刀砍其足至折亦不降遂殺之

木甲脫魯灰

上京人哀宗卽位授鎮南軍節度使蔡州管內觀察使行戶工部尚書二年秋傳言宋將入侵農司令民先期刈禾脫魯灰但遣軍巡邏聽民待熟而刈宋人卒不入寇九年從行省叅政徒單吾魯將潼關兵入援至商山遇雪元兵邀擊之士卒皆凍不能戰而潰脫魯灰被執不屈自殺

完顏陳和尚

名彝字良佐系出蕭王小字陳和尚天資高明雅好文史自居禁衛日人以秀才目之後從太原王渥受孝經小學論語春秋左氏傳通其大義軍中無事則憇下作牛毛細字若寒苦之士其視世味漠然也哀宗時任忠孝軍提控五年元兵入大昌原平章合達問誰可爲前鋒者彝出應命擐甲上馬不反顧是日

以四百騎破八千衆奏功第一授定遠大將軍彝所
領忠孝軍皆回紇乃蠻羌渾及被俘來歸者最號難
治彝御軍有方所過秋毫無犯每戰則先登疾若風
雨諸軍倚以爲重六年有衛州之勝八年有倒回谷
之勝九年鈞州城破縱軍巷戰知不可爲遂自匿殺
掠稍定出自言曰我忠孝軍總領陳和尚也大昌原
衛州倒回谷之勝皆我也我死亂軍中人謂我負國
家今明白死天下必有知我者時欲其降使之脆砍
足脛至折不屈割吻至耳噴血而呼迄死方絕元將
義之酌以馬潼祝曰好男子他日再生當令我得之

詔贈鎮南軍節度使塑像褒忠廟

溫迪罕老兒

同知上京留守事蒲鮮萬奴攻上京其子鐵哥生獲
老兒脅之使招餘人不從鐵哥怒亂砍而死贈龍虎
衛上將軍

高憲

遼東人天資穎悟博學強記乙科登第爲博州防禦
判官後遼陽城破死於難

高閻山

元兵徇懿州閻山死之

劉仲寧

元兵徇錦州元帥劉仲寧死之

完顏醜和

怨之子官鳳翔萬戶以死節贈懷遠大將軍

冀禹錫

中京路利州龍山人至寧初進士歷州郡有聲歸德

受兵禹錫為行院都事經畫守禦一府倚重及聞變

或勸以微服免不從遂遇害

石抹世勣

子嵩階

字景畧幼勤學為文有體裁承安二年以父元毅死

王事收充擎執五年登詞賦經義進士貞祐三年累

官為太常丞時朝廷徙河北軍戶河南議給以田世

勣上言荒閒之田及牧馬地其始耕墾費力當倍一

歲斷不能熟若奪民素時者與之則民將失所上大

悟乃罷之正大中為禮部尚書天興元年冬哀宗北

渡世勣從行明年六月走蔡州次新蔡之姜寨世勣

子嵩時為縣令拜哀宗於馬前哀宗嘉之授嵩應奉

翰林文字以便養親城破父子俱死於難嵩字企隆

興定二年經義進士

擎執官名

完顏豬兒

蕭王之裔天興二年爲南面元帥扈從哀宗走歸德方濟河北風大作後軍不克濟元兵追擊於南岸豬兒戰死黃陵岡詔贈官卽日補其弟長住爲護衛

烏古孫仲端

字子正承安二年策論進士性寬厚知大體奉公好善獨得士譽哀宗將遷歸德召爲翰林學士承旨留守汴京元兵圍汴自度事不可爲從容自縊其妻亦從死

完顏仲德

合懶路人泰和三年進士哀宗卽位同簽樞密院事行院於徐州州城東西北三面皆黃河而南獨平仲德疊石爲基增城之半浚隍引水爲固民賴以安正大六年移知鞏昌府兼行總帥府事時陝西諸郡已殘仲德招集散亡得軍數萬依山爲柵屯田積穀人多歸附號令明肅至路不拾遺天興元年行尚書省事於陝州及哀宗徵諸道兵入援仲德提孤軍千人歷秦藍商鄧擷果菜爲食間關百死至汴至之日適哀宗東遷妻子在京師五年矣仲德不入其家趨見哀宗於宋門力勸當西幸秦鞏不宜北渡不從二年正月車駕至歸德以仲德行尚書省於徐州五月詔

仲德赴行在時官奴已變官屬懼爲所給勸勿往仲德曰君父之命死亦當行尋使者至果官奴之詐六月官奴誅詔仲德議遷蔡仲德欲奉上西幸因贊成之及蔡領省院選士括馬繕治甲兵未嘗一日無西志忠孝軍提控李德率十餘人乘馬入省大呼以月糧不優幾於罵詈仲德縛德杖之六十哀宗諭仲德曰此軍得力方欲倚用卿何責罰乃爾仲德曰時方多故錄過隱功自陛下之德將帥之職則不能小犯則決大犯則誅強兵悍卒不可使一日不在紀律也軍士聞之至於國亡不敢有犯蔡旣受圍仲德營畫

備禦未嘗一至其家拊存軍士無不得其歡心將校有戰亡者親爲賻祭哭之盡哀西城破城中前期築柵浚濠爲備雖克之不能入也但於城上立柵南北相去百餘步而已仲德摘三面精銳日夕戰禦終不能拔三年正月元兵鑿西城爲五門整軍以入鏖戰及暮乃退次日復入仲德率精兵一千巷戰自卯及巳俄見子城火起聞上自縊謂將士曰吾君已崩吾何以戰爲吾不能死於亂軍之手遂赴汝水死於是參政李木魯婁室兀林答胡土總帥元志元帥王山兒紇石烈柏壽烏古論桓端及軍士五百餘人皆從

死焉仲德平生喜怒未嘗妄發聞人過常護諱之雖在軍旅手不釋卷門生故吏每教以名分家素貧敝衣糲食終身晏若雅好賓客推轂善類人有寸長極口稱道其掌軍務賞罰明信號令嚴整故所至軍民爲用至危急死生之際無一士有異志者南渡後將相文武忠亮始終無瑕仲德一人而已

烏古論黑漢

初以親軍入仕嘗爲唐鄧元帥府把軍官天興二十一年唐州刺史病卒帥府承制以黑漢權刺史行帥府事宋兵攻城急惟裕州大成山聶都統一軍五百人共守城中糧盡人相食黑漢殺其愛妾啖士士爭殺其妻子馮總領欲降聶都統斬之馮之黨趙醜兒開門納宋軍黑漢率大成山軍巷戰見執不屈死

趙仁榮

忠愍公炳之子炳爲郭琮郭叔雲所害事發伏誅籍其家以付仁榮仁榮曰不共戴天之讎所蓄之物皆取於民何忍受之帝別賜鈔二萬二千五百緡爲治喪具仁榮後仕至中書平章政事

完顏斜烈

哀宗縊於幽蘭軒權點檢內族斜烈以君命召承御

石盞氏近侍局大使焦春和內侍局殿頭宋珪赴上前曉以名分大義及侍從宮巴良弼阿勒根文卿皆從死斜烈遺言完顏絳山使焚幽蘭軒乃自殺

劉海

字濟川興州人金進士第一仕至河南府尹死於國

難

趙愨

女直人卽朮要甲氏訛爲趙家遂以趙爲姓仕至威勝軍節度使死王事諡忠愨長子良貴嵩汝招討使良貴子讜許州兵官愨從子良材守太原俱死事愨

子良弼仕元奉使日本將行奏臣父兄四人死事於

金乞命翰林臣文其碑臣雖死絕域無憾矣帝從其

請

完顏絳山

哀宗之奉御也系出始祖天興二年蔡城破哀宗自縊內族斜烈從死遺言絳山使焚幽蘭軒元兵入絳山不去爲兵所執兵曰衆散走而獨後何也曰吾君終於是候火滅收瘞其骨耳兵笑曰汝狂者耶汝且不能保能瘞爾君耶絳山曰吾君有天下十餘年身死社稷忍使暴露遺骸耶得瘞吾君寸斬不恨兵以

告其帥奔盞曰奇男子也許之絳山乃掇其餘燼葬
汝水之傍號泣將赴水死軍士救之後不知所終

元

石天應

字瑞之興中承德人善騎射木華黎南征承制授興
中府尹俾從征臨機應變捷出如神旗用純黑人目
之曰黑軍後從木華黎征陝右攻葭州拔之因說木
華黎以勁兵留守葭蘆分兵四出悉定葭綏之地以
功遷兵馬都元帥移軍河中金軍潛師由中條來攻
天應力戰死初天應死事時弟天禹子佐中伺敵少

懈倒抽其斧反砍之突城而出趨木華黎行營求得

蒙古軍數千回與敵戰敗之木華黎嘉其勇奏救金

符行元帥

劉德仁

遼東川州人爲律州節度使丙戌金將移剌副樞攻
絳州城陷死之

耶律忒末

子天祐附

契丹人元初授帥府監軍與其子天祐從征花馬劉
帥有功木華黎承制授忒末真定路安撫使洺州元
帥復以功遷河西路安撫使兼澤潞元帥歲壬午致

仕居真定子天祐襲職乙酉金降將武仙據真定叛
殺守將史天倪忒末父子踰城出將以聞遇天倪弟
天澤於滿城合蒙古軍而南遂走武仙復真定朝廷
以天澤襲兄爵而以天祐鎮趙州明年仙復犯真定
天澤潛師出藁城忒末與妻石抹氏及家孥在真定
者皆陷焉仙遣忒末僕劉攬兒持書誘天祐言能以
趙州降當活汝父母忒末密令攬兒語天祐曰汝能
固守不失國家大計我視刀鋸甘如蜜矣天祐痛哭
承命馳至藁城以賊書示史天澤天澤曰汝能遵父
命忠誠許國功不在王陵下天祐乃趨還趙壁率衆
殊死戰仙怒盡殺忒末家一十八人天祐益忿力殺
賊仙兵屢挫丁亥賊棄城走追至藁城與天澤兵擊
殺叛將張林加洺州征行元帥趙州安撫使以傷憊
致仕卒

李伯溫

義州人李守賢之孫穀之子也行平陽元帥府事鎮
青龍堡知平陽已陷弟守忠被執選驍勇拒守久之
金人盡銳來攻李成開水門導入伯溫登堞樓謂左
右曰吾兄弟受方面之寄今不幸失利誓以死報國
吾弟已被執我不可再辱汝等宜自逃生士卒皆不

忍去伯溫拔劍先殺其家屬投井中自以刃植柱刺
心死後金兵登樓見伯溫抱柱面色如生共稱爲烈
士

李伯通

穀之次子歲甲戌錦州張致叛國王木華黎命擊之
大戰城北伯通死之

石抹昌齡

與中人以廬墓被旌

李守忠

義州人官至河東南路兵馬都元帥兼知平陽府事

壬午冬平陽公胡景山以青龍堡降嘗從攻益都北

還軍將彭智孫乘間據義州叛守忠聞之長驅抵城

下力戰復之丁亥夏四月援權國王按察兒于洪洞

會於高梁師潰平陽陷金人執守忠至汴誘以高爵

守忠大罵不降金人怒置鐵籠中火炙死按元史李

弟守忠被執又云子守正自幼嘗質於木華黎又云

守正累瘡戰歿以其兄守忠代之夫守忠既爲守正

之兄則不得爲伯溫之弟

矣簡冊有誤存疑以俟考

李守正

伯溫子爲平陽守活俘虜甚衆以功授河東南路兵
馬都元帥歲庚寅上黨晉陽合兵攻汾州守正赴援

衆寡不敵別遣老弱百人曳柴揚塵多張旗幟敵懼
遂解去汾人迎犒者泣謝曰幸公完是州德甚大願
奉是州以從關中兵屯吉州酋領楊鐵鎗以數千叛
守正出兵擒之軒成據隰州守正往擊之中矢傷足
會金完顏合達攻平陽守正畏瘡戰歿大帥以其兄
守忠代之

蕭拜住

契丹石抹氏也武宗時拜御史中丞仁宗卽位進中
書右丞平章政事時鐵木迭兒再入相恃勢貪虐拜
住每牽制之御史中丞楊朶兒只復糾正其罪遂罷

相仁宗崩鐵木迭兒假太后旨收拜住及楊朶兒只
殺之是日風沙晦暝道路以目會天災求言平章張
珪告丞相拜住曰蕭楊等寃宜急昭雪丞相以聞詔
贈拜住薊國公諡忠愍

攸哈剌拔都

渤海人初名興哥金末避地大寧元兵至出高州富
庶寨射獵以食屢奪元營孳畜又射死追者木華黎
率兵攻寨寨破奔高州力屈始降從木華黎攻通州
州將出寶貨以降木華黎命興哥恣取之興哥獨取
良馬三以賞兵士木華黎以其功聞太祖賜名哈剌

盛京通志 卷之三十五 三
拔都後從木華黎畧地燕南以功授河東北路兵馬
都元帥鎮太原修城池繕甲兵招降屬邑市肆不改
嘗微服夜出聞民間語曰吾屬父母子女相失矣死
者不可復生生者無以爲贖奈何明日因下令軍中
凡俘獲有親者聽贖無貲者官爲贖之民得完聚者
衆庚辰二月破金西風寨又破隰州辛巳三月哈刺
拔都引甲騎十餘人救壽陽至王胡莊道三交大戰
金兵遁五月金趙權府帥兵三萬圍太原哈刺拔都
將三十騎出西門令騎曳柴揚塵宣言曰國兵三萬
至矣金兵懼潰遁去癸未大敗金師於太谷縣甲申

十月平陵井寨乙酉二月降清泉寨酋長王毅降石
家昂亦降丁亥五月奸人夜獻太原東門於武仙金
兵大至諸將呼拔都出拔都曰我誓與城同存亡遂
歿於陣長子忙兀臺嗣守太原

張洪範

北京人親喪廬墓詔旌之

孫秀實

大寧人性剛毅喜周人急里人王仲和嘗託秀實貸
富人鈔二千錠貧不能償逃去數年其親思之成疾
秀實日饋薪米存問又爲代償取券還其親復命奴

資金訪仲和使歸父子歡聚聞者莫不嗟美又李懷
玉等貸秀實鈔數千餘錠度無以償盡還其券不復
徵人咸義之事聞詔旌之

按前志載施木棉喪及置義阡事乃大同人賈進所

為誤採入故刪去

郭全

遼陽人父廷玉卒倚廬三載時繼母唐古氏生四子
皆幼全躬耕奉養四子繼長各求分析全不能止凡
田廬器物皆取朽敝者唐古氏卒全年六十餘哀毀
廬墓詔旌其閭

劉廷讓

大寧武平人至順初遇兵亂挈家走避追兵急廷讓
棄子抱弟扶母疾驅得免事聞旌之

高守質

潘州人事親篤孝詔旌其門

明

鄧佐

定遼前衛指揮使狀魁梧性剛勇提督王翱保陞都
指揮僉事成化三年隨副總兵施英按鳳集堡佐以
五十騎為前鋒當二千餘人并力死戰佐右手拇指
剔絃見骨知不可為乃自刎五十人無生還者報未

至遼人遙見佐衆挾弓矢鼓吹前導自東而回僚屬皆出迎竟不至佐家亦聞鼓吹聲入門迎之不見事聞立祠歲時致祭

國朝尤重其節

尚忠

義州人百戶劉雄部軍景泰間敵人深入至南窰河雄率忠力戰馬中箭死忠以已馬授雄潰圍而出忠亦得脫人多稱其忠勇爲難及

趙忠

廣寧右衛指揮僉事守鎮靜堡正統間北兵圍堡急忠語妻曰封疆之臣當死封疆若城破則吾與城俱汝母子當自裁因乘城力戰時有訛言城陷者忠妻女皆縊死而忠守益嚴攻圍兩晝夜不能拔遂解去守臣上其事以全城功陞指揮同知賜金爲妻女營葬旌其門

胡珍

定遼中衛指揮僉事成化中平頂山力戰死之

常潤 劉璘 耿秩

潤與璘俱定遼中衛指揮與前衛指揮耿秩俱於平頂山力戰死

高 臣 趙 昂 康繼宗

俱東寧衛指揮平頂山力戰死

劉 旺 子答廝附

三萬衛都指揮成化間與其子答廝於古城堡設伏
援絕矢竭突陣力戰父子俱歿

蘭 英

蓋州軍成化九年春隨廣寧總兵歐信追敵於小黑
山敵因風縱火軍潰信馬中箭死英以已馬授信得
出英遇害事與義州軍尚忠同一得脫一遇害若有
幸有不幸焉李御史有碑詞表之

劉 鼎

遼陽人初喪生母嫡母姚氏撫之成化中任鴻臚序
班姚氏沒鼎在京邸聞訃奔至葬所悲哀結廬負土
築墳事聞旌表

李 用

廣寧生員洪治間母張氏卒既葬廬於墓側晨昏哭
奠事聞旌表

邵 義

鐵嶺人未婚父母皆亡義竭力殯葬廬墓三年鄉人
憫其孝勸之婚親迎畢不入房室復廬墓三年

劉定

遼陽人父玉任正千戶以疾卒定廬墓悲哀負土爲墳事聞旌表

吳裕

廣寧人少孤母王氏教育備至比長遊庠出貢禮部會母疾衣不解帶藥必先嘗母卒時裕哀毀慘悴旣殯結廬墓側晨昏哭奠三年如一日仕至和州判官年八十餘卒於家

紀刺漢

廣寧人五歲喪母及長父聰病篤思肉乃割股煎湯以進父遂愈六載始故廬墓三年撫臣書孝行扁於門

門

史藩

廣寧人天性和平樂聽善言母病朝夕侍立疾篤益勤苦夜不就枕及卒行古喪禮倚廬中門絕酒肉遠幃簿三年不出給事中賀欽作倚廬記以表之

李慶

錦州人官百戶四世同居慶年至百餘歲

張寶

錦州人四世同居

文淵

蓋州人居父母喪哀毀盡禮先後廬墓六年仕至陳州知州高陵呂柟銘其墓

李光祖

遼陽人父敏以學行稱正德間敏以疾卒光祖三日不食哀毀踰節比葬廬墓三年

程鎮

廣寧人太學生母病日侍湯藥寢不解衣母病轉痢醫言糞甘滑者不治鎮嘗之果甘遂悲號幾死母旋卒值鄰失火風急勢迫鎮撫棺號日萬一不虞與母俱焚俄反風滅火人咸異之

姜節

金州人父早亡正德間母周氏病節日夕拜禱獨宿戒酒肉密封股和羹奉母食之病遂愈至九十餘無恙

葉洪

廣寧人幼孤依母度日嘉靖間母病思食肉麪餅不能辦乃傭於人得麪一升又苦無肉遂剖股肉以進母病即愈

趙堂

廣寧人父母先後俱病甚堂割股進食病咸愈
宮守禮

寧遠生員性端謹好古執禮父思問病篤守禮衣不
解帶藥必親嘗及卒哀號累日廬墓三年有白雀來
巢於廬事繼母甚孝朝夕率妻拜問母初欲更適感
其孝遂已與鄉人飲無少長咸肅然守臣上其事旌
表其門

王斌

開原人母閻氏久病無方可療斌向土神廟祈祝乃
割肋取肝一片煎湯以進母食之病即愈斌亦無恙

朱國禎

寧遠中前所人官指揮父歿居喪盡禮力營葬事治
墳塋松楸鬱然皆手植也結廬墓側朝夕哭奠如初
喪制終瘠羸而死有足悲者妻劉氏艾年守志撫孤
成立一時節孝並稱

周顯時

蓋州人父愛幼子臨終以三千金私予之及卒顯時
廬墓三年終身篤友于之誼若弗知予金之事者後
官至總兵

線補袞

寧前左叅將嘉靖間戰於小團山面中流矢而卒御
史上其事立祠祀之

楊維藩

寧遠人爲中路遊擊將軍嘉靖間廣寧鎮武堡戰死
贈都督僉事祠祀之

楊照

前屯衛人維藩姪遼東總兵官都督同知嘉靖間戰
歿遣官諭祭贈少保諡忠壯立祠

李如松

寧遠伯成梁子也萬曆間張居正當國推選名將是

時成梁與戚繼光齊名而武功較戚爲多故得封伯
世襲五子俱膺節鉞如松居長智勇尤爲傑出萬曆
間寧夏哮拜父子合劉東陽等倡亂命如松討之如
松先登八城功第一會日本攻陷朝鮮上命宋應昌
爲經畧應昌舉如松爲征東提督奮勇先登倭衆驚
遁半載之間連平大寇威名甚著後追敵陷伏中死
之贈少保襲寧遠伯諡忠烈

李孔効

遼陽舉人崇禎十二年知竹溪縣明年八月張獻忠
李自成等十三營圍城孔効百計以禦總兵左良

王擁兵不救防兵內應城陷孔効持刃伏短垣間伺賊過輒殺力盡被執大罵不屈而死

應時盛

遼陽人起家小校至都督僉事任山西撫標中軍副總兵慷慨仗義都御史中丞蔡懋德深倚之闖逆犯太原時盛誓衆死守賊招之不降城破中丞蔡懋德拔刀自刎爲麾下所奪時盛請下城巷戰遂扶懋德上馬時盛持矛突殺數十人至炭市口賊衆充斥時盛呼曰且擁公出西門懋德不行下馬據地坐時盛已出城還顧不見懋德復砍門入曰公不負朝廷中軍焉敢負公請與公俱死遂同入三立書院懋德就縊未絕時盛釋甲加諸肩乃絕時盛再拜訖卽下弓絃自勒而死

楊倫

前屯衛人副總兵崇禎間陣亡僉憲題旌祠祀之

趙允植

遼陽人崇禎二年任盧龍教諭品行端方勤於訓士凡有啟迪必以忠孝行誼爲先庚午兵燹與妻欽氏暨女同死

李鳴鳳 羅文耀

鳴鳳前屯衛總兵文耀副總兵也衛城破俱死之

王定宸

寧遠總兵與大同總兵曹變蛟俱力戰死

高應詔

遼東人以指揮同知分防水冶鎮明末流賊東下應詔率兵連戰破之賊大舉入寇復拒之於倪村孤軍援絕遂戰死水冶卒全賊退民求得其屍葬鎮之東原

楊國柱

字廷石遼東人精騎射以功佩將軍印總宣鎮兵死

於戰建祠歲祀額曰旌烈

王世泰

遼東歲貢崇禎時知內邱寇掠西山與弟世寧禦之戰死

吳良能

遼東葢州人崇禎時知滕縣十五年城破良能拜辭其母單騎犯陣死

李輔明

遼東人任山西總兵官罷歸戰歿於寧遠贈左都督列壇前屯衛祀之

周遇吉

錦州衛人有力善射崇禎中累功至京營前鋒副將
加大子少保左都督十五年陞山西總兵汰老弱繕
甲仗練勇敢一軍特精十六年十二月李自成陷全
陝將犯山西遇吉分兵扼河上流以下流蒲坂屬巡
撫蔡懋德而請濟師於朝十七年二月太原陷懋德
死之賊遂陷忻州圍代州遇吉憑城固守潛出兵奮
擊連殺賊無算會食盡援絕退保寧武賊踵至呼曰
五日不降且屠城遇吉四面發砲殺賊萬餘火藥盡
圍益急賊百道攻城內百計禦之城再圯再完傷賊

四驍將自成欲退其將曰我衆百倍於彼但用十攻
一番進遞體靡不勝矣自成從之賊死亡如麻而官
軍力亦竭城遂陷遇吉巷戰身集矢如蝟遂見執不
屈死遇吉舍中兒及城內士庶感遇吉忠義咸呼噪
巷戰殺賊不可勝計而兵民亦死亡畧盡自成每語
人曰使守將盡如周將軍者我安得至此遇吉妻劉
氏率婦女數十人據山巔公廨登屋而射每一矢斃
一賊賊縱火焚之闔家盡死於難

盛京通志卷之三十五

盛京通志卷之三十一

孝義

本朝

前志於人物中分孝義一則凡古之忠臣義士孝子
悌弟皆載焉獨於

國朝未經論定今

聖天子表揚幽隱各省忠孝已皆詳核入志凡

盛京人物節烈著於山陝閩滇中者皆得略見始末採
而輯之

席漢巴圖魯

東戡人以功授三等精奇尼哈番隨攻朝鮮及義州
皆先登取其城後遇敵於三塔力戰殞身 贈二等
伯後加 贈一等公

滕應元

正白旗佐領天聰四年灤州力戰死世襲拜他拉布
勒哈番

納兒臣

授拜他拉布勒哈番攻伊汗納林城先登克之陞三
等阿達哈哈番同十六員章京効力行間功勳茂著
後攻沙嶺城奮勇力戰死諡忠壯

超合羅

滿洲人少勇敢有爲初授肅章京以才能著聞歷陞
禮兵二部侍郎兼拜他拉布勒哈番隨征山東遇馮
太監兵奮勇擊敗之隨攻下任邱縣又以兵擊郝總
鎮敗之及整衆出邊又擊敗太平寨馬步兵後征錦
州敵兵出戰城外超合羅奮勇衝鋒死之諡果壯

勞 漢

滿洲人年二十以趨勇聞從攻撫順時明總兵張承
廕援師甚銳漢請示弱以誘之敵少懈漢率衆繞擊
大敗其師遂襲撫順先登克之明經略楊鎬命杜松

將精卒趨瀋陽至渾河我軍邀擊戰良久漢中流矢
鏃陷肉中去其筈奮呼衝陣左右披靡大軍繼之明
杜松劉綎等皆戰死勞漢在行陣十四年大小五十
餘戰攻拔數十城皆獲全勝及圍義州久不下值夜
雲密布城上寂無聲漢乃潛跡緣城將登伏發矢如
雨下重創而死年三十四

陳錦

字天章瀋陽人順治初陞浙閩總督延平向有將軍
寨俯瞰順永將沙四邑寇踞其巔錦統衆填上高與
寨齊乘以登遂奪其巢適漳平圍急錦提師赴援次

同安縣爲刺客所害

金玉和

遼東人初爲河北總鎮逆闖攻懷慶諸屬玉和鼓勇
迎戰死之

王昌齡

楊致祥
金元祥

黃廷栢
佟國仕

張耀祖

昌齡遼陽人順治元年初任屯留令屢請豁磽确田
賦得允乃止嘗書銘堂右略曰令官甚卑權甚重於
民又甚親卑則持躬宜謙重則執法宜平親則存心
宜慈後累官冀寧道殉姜逆之難 贈光祿寺卿又
潞安知府楊致祥汾州知府黃廷栢以殉節俱 贈

太僕卿臨縣知縣張耀祖以殉節 贈按察司僉事
 寧武兵備道金元祥以殉節 贈光祿少卿并陘叅
 將佟國仕聞亂巷戰見殺 贈副將以上俱遼人並
 從祀忠烈祠雍正二年

御賜成仁取義匾敬懸祠內

祝文光

遼東人順治四年以監生任定襄令有廉聲姜逆之
 亂死於難

崔尚質 佟學詩 陳思忠

尚質遼東人順治四年任繁峙令治行最一時姜逆

之亂城潰闔家自焚 贈按察司僉事祀忠烈祠又

襄垣令佟學詩屯留令陳思忠皆遼東人姜逆之變
 俱為沈賊所執不屈而死

李向禹

鐵嶺人順治五年以貢生任陵川縣姜逆之亂妻王
 氏謂向禹曰君職守土宜竭力報國無以家為念向
 禹領之率家僮出為禦賊計王氏自縊二女亦縊死
 城旋破向禹死之

朱衣助

字文佑遼東人順治五年知深州時土寇未靖披堅

執銳為士卒先捍衛撫循士民德之歷任操江為鄭兵所獲不屈而死

李允升

遼東人順治六年以貢生知長子縣姜逆之亂其黨沈某夜半冒官軍入城允升被執不屈死之

鄭宏圖

遼陽人國學生順治六年任河東鹽運司同知甫蒞任值姜逆之亂登陴守禦力盡城陷死之 贈布政

司叅政祀忠烈祠

佟養昇

遼東人奉

旨養馬大同姜逆之亂巷戰不屈死

李向堯

鐵嶺人任助馬路叅將姜逆之亂闔門殉節 贈左

都督僉事祀忠烈祠

曹之賢

遼東人順治四年以官生知文水縣年少精敏剖決如流姜逆之亂竭力捍禦城陷遇害

徐淳

遼東人順治間任岢嵐兵備僉事姜逆之亂偏關遙

應之淳見執於賊脅降不屈死 贈光祿寺少卿廕
子入監祀忠烈祠

林中瑜

遼陽人順治三年協鎮太平奉檄勦撫麻姑港口兩
建虜功郡東小醜竊發中瑜領兵搗賊巢馬陷深塹
死之

吳國用

遼東人順治六年知霍邱縣時陳伯紹倡亂擁眾入
城國用揮刃躍馬率甲士巷戰力盡自刎 贈按察
司僉事廕一子

王來觀

遼東人嘗任河南分守道降霍州知州姜逆之亂以
霍爲南北孔道攻尤力來觀督兵以守城陷血戰死
祀忠烈祠

李懋祖

子廷賡附

順治初由貢生授平度知州陞湖廣兵備副使護廣
西巡撫事時何騰蛟圍城九月城破懋祖及子廷賡
殉難 贈光祿寺卿廕子

董璘

郭之秀

甘體坤

柯永新

璘遼陽人順治三年知沙縣時縣境初闢璘悉心撫

字始有更生之樂四年逆寇攻城糧乏待援不至死
之又福安令郭之秀拒寇死海澄令甘體坤不受僞
命死光澤令襄平舉人柯永新值變不食死雖生平
行事不概見忠節已光史策矣

張必科

蓋州人恩貢順治四年知慶雲縣甫兩月宿弊盡革
遇寇至卽聚步騎親逐之會巨寇猝集勵衆戰且守
必科箭無虛發忽絃斷手傷擲其弓曰命矣猶當尋
一死所遂提戈下城至一書齋舉火自焚事平 贈
僉事

徐 勇

榆林籍遼東人順治四年以都督鎮長沙明流寇犯
安仁勇一鼓殲之是冬一隻虎等率衆薄長沙勇勒
兵與戰賊益衆乃嬰城堅守賊攻不能下遁去陞辰
沅鎮總兵復值黔寇犯辰州與叅政劉昇祚等同心
捍禦力盡城陷死之

塗 廓

遼東人任河南河北兵巡道駐磁州順治六年寇陷
隆平延及武安廓親率兵勦捕馬蹶陣亡 贈光祿
寺卿于州北五里鋪建祠祀之

唐士傑

遼東貢士順治間除南漳縣時逆賊盤踞西山出沒無常士傑每挺身交戰後賊勢蜂擁力不能支遂自焚死

夏廷印 沈文華

廷印廣寧人官神木副使以清恪聞順治五年高有才之變慷慨赴難死於府谷 贈太僕寺卿時延綏總兵義州沈文華追王永疆陷高有才伏中亦爲所害

王希舜

奉天遼陽人順治四年由貢生知西安府五年陞分巡河四道寬簡愛民王永疆作亂不屈死之

遲變龍

滿洲人爲江西布政時封疆初定變龍悉心撫集歸業者日衆順治戊子直金聲桓據城叛變龍以大義格之遂遇害闔門殉者數十人

宋賢都

奉天人順治五年知城武縣時李化鯨之變賢都猝不及備先以甘言怠其謀化鯨遂攻曹縣賢都募死士夜薄其營化鯨覺還兵攻城武賢都力戰死闔門

二十八人皆被屠膾邑人哀之建祠祀焉

徐大用

字器之奉天人初任萊州守清廉愛民秩滿卽以叅議道分守萊州順治十年膠州總兵官海時行素驕蹇奉調南征不行嗾兵爲逆逼大用同入海不從遇害州人建憫忠祠祀之

李文學

奉天人順治六年由貢生知定陶時李化鯨餘黨邢可觀猶負固榆園文學蒞任三月遇賊於白塔坡挺身與戰身被數創死之

蔡廷琰

廣寧人初以拔貢任兗州府學訓導順治四年署嶽秋捕河通判擒土寇丁惟嶽論功陞曹縣教諭及李化鯨陷城廷琰力戰死之

劉登科

奉天人順治十三年由監生知黃巖縣十四年海寇陷城脅降不從遂縛投三江水中士民哀之

文運亨

遼東人順治十六年以茂才任永州府新田知縣值徭賊犯城運亨率兵拒守賊衆大至城陷死之

范承謨 嘛呢附

字覲公遼陽人國初賢相范文程次子也順治壬辰
成進士康熙六年教習庶吉士七年巡撫浙江絕苞
苴除豪猾請蠲浙東逋賦並請緩征絲米俱報可後
晉福建總督浙民泣送擁舟不得行又有瞽者百餘
人請進抱公足許之諸送者益相牽挽凡十餘日舟
始行抵閩未幾耿精忠反欲脅承謨同起事承謨憤
詆之被繫七百餘日卒遇害泰寧人許鼎夜收燼骨
潛送 京師 賜祭葬 贈太子少保諡忠貞閩人
建祠道山之麓康熙三十四年

御賜忠貞炳日匾懸祠內方承謨被繫時有蒙古人嘛呢

一者謀欲免公於難事泄精忠訊之大言曰范公忠臣
爾逆賊寧與忠臣同死不與逆賊同生精忠怒磔之
承謨博學強記善屬文有吾廬稿百苦吟畫壁詩浙
閩奏議行於世

王之儀

字虞廷廣寧人順治七年知寧鄉縣時姜逆初平之
儀招徠逋亡且爲規畫生計民稍復業嘗暴雨水漲
毀城垣十丈有奇之儀立淋潦中督衆完築城獲不
圯水退築護城堤於外植柳其上人皆便之尋遷海

寧州陞知福州府耿逆之難罵賊死 贈太僕寺卿

祀九忠祠

高天爵

字君寵鐵嶺人順治十一年知長沙飭屬員慎催科民以不擾調江右建昌府康熙甲寅耿逆變天爵曰建昌不守則南昌危因請兵自將防其西出募丁壯繕城垣躬擐甲胄與賊戰被執不屈死 贈太僕寺

卿諡忠烈

范文英

遼東人饒州同知與知府郭萬國死耿逆之亂 贈

布政司叅議

李成功

遼東人順治乙丑進士任叅將隸湖鎮劉進忠麾下康熙十三年耿逆叛進忠密受偽職成功謀與于國璉共誅之機泄被執不屈死事 聞贈驃騎將軍同時死義者張繼善于國璉白虎何亮事見廣東名宦于國璉

遼東人續順公標下防禦也性忠勇與叅將李成功謀誅叛鎮劉進忠事泄進忠擊璉璉奮呼陷陣射進忠中臂力戰三晝夜死之

陳啓泰

鑲紅旗貢生康熙三年任巡海道搏擊豪強奸宄斂
跡甲寅耿逆偽檄南下啓泰密與海澄公黃梧謀拒
守會梧病事不可支妻劉氏及女先自縊妾婢二十
餘口相繼死啓泰從容引僚屬入視皆相顧失色啓
泰慷慨陳義無異平時具朝服再拜乃自盡 贈工
部左侍郎諡忠毅時邵武知府張瑞午與同知高舉
謀討賊被擒不屈死建寧同知喻三畏罵賊死福寧
總兵吳萬福拒戰死全家被屠事聞瑞午 贈太僕
寺卿與三畏並 贈按察司副使萬福 贈太子

少保康熙二十五年並祀九忠祠

王應奎

錦州人康熙十四年知南豐縣時耿逆叛閩山寇響
應應奎率家衆與鎮兵分守縣城及城陷應奎死之

贈按察司僉事

馬雄鎮

字錫蕃遼陽人歷官僉都陞學士任廣西巡撫值羣
寇煽亂平梧諸郡雄鎮勦撫並行計斬巨魁楊其清
等賊衆瓦解首清鹽課蠲權稅建學勸民九郡晏然
康熙十三年滇逆構禍孫延齡附之雄鎮密檄提督

馬雄會勦雄遷延不至因蠟疏具狀遣子世濟世永
間道入京乞師延齡詞知發兵圍之脅以死不為
動後為吳世琮所殺闔門死者百餘人贈太子少
保諡文毅郝浴請建雙忠祠祀之

喻三畏

遼東人由貢生知穎州有廉惠聲清刑獄平賦稅修
葺聖殿及文昌宮重築西湖堤岸濬濠閘以通水
利穎人德之康熙八年任建寧同知耿逆難作與福
州知府王之儀侯宮知縣劉嘉猷千總廖有功同遇
害贈按察司副使予卹廕三十五年特祀九忠祠

甘文焜

何善

雅圖

李興元

楊應鸚

文焜鑲藍旗人累遷雲貴總督康熙十三年吳藩變
起倉卒文焜令妾盛氏等自縊急走鎮遠為守將姜
義所窘遂殺其幼子自盡於吉祥寺時筆帖式何善
雅圖各棄家從文焜皆死之事聞贈文焜兵部尚
書諡忠果又按察司李興元守節不屈與貴陽府同
知楊應鸚先後被害皆遼東人

劉浩

遼東人由治中擢知潯州康熙十三年孫延齡以桂
林叛浩櫻城拒賊副將蔣秉鑑內應執浩送賊營父

子五人抗節不屈同時殞命闔門被害者百餘人事
聞贈太僕寺卿

段應舉

鑲黃旗人康熙十五年提督福建軍務當克收全郡
時誓師戒殺秋毫無犯寇圍海澄食盡兵民無一叛
者城陷應舉自縊

滕天成

正白旗人承襲佐領康熙十五年征浙閩力戰海澄
豬頭山死之 賜頭等阿達哈哈番加拖沙拉哈番
王忠孝

遼東人康熙十九年署左翼鎮總兵進勦滇南衡鋒
破敵身先士卒引兵逼城深入陷陣 贈都督同知
廕一子

符盛

遼東人康熙十九年知廣安州九月值譚宏之變為
賊所縛不屈死之 贈四川布政司叅議

賜祭葬

王之鼎

字公定奉天人康熙十九年以定海將軍充四川提
督恢復全蜀提兵進援永寧九偽將軍之衆圍之數

臣三閱月糧盡援絕猶率兵挑戰士氣益勵賊以火藥轟城城陷被執拔刀自刎未殊昇至貴陽賊黨百方勸脅不屈遂與總兵何成德等十二人同時被害是日黃塵蔽天大風拔木事 聞賜諡忠毅贈少保卹廕有加士民籲建祠

御書忠節留芳匾額以旌之

魏萬侯 子棟附

奉天人武進士任浙江溫鎮左營遊擊康熙甲寅夏閩寇圍瑞安縣萬侯率師援擊至北湖嶺斬馘甚眾以後軍不至退保慈湖既而羣賊蜂集勢不能支力

戰死之長子棟亦歿於軍萬侯 贈副將棟 贈國

子監助教

蘇木代

滿洲人任樂清城守副將溫郡既陷人無固志木代堅意拒守為其下所害

繆鴻業

海城人親歿廬墓知縣王沛恂書忠義節孝四大字於學宮之壁而以鴻業廬墓事註孝字下以示獎勵

祖 西

國戚之後素有孝行其母病歿三年廬於墓側哀毀

盡禮康熙五十二年 旌表

烏爾喀

打牲烏喇鑲紅旗人於官庄地方拾白金一斤覓失

銀者還之事與永吉州李生春遺金不昧同

聲教所及無遠弗届豈不信哉

盛京通志卷之三十一

